


Lukaq É Gabú Danglù Laiká Mâ É Mhô-myi Pé

Laiká Bùk – III



BO É DANG-U PÉ

| | Nghap Cham | Dang- u | Laiká Myòq |
|-----|--|---------|---------------|
| 11. | Ge É Samariq Byù | | 1 |
| 12. | Byùq Byùq É Yùqzo | | 19 |
| 13. | Manggâm Dàp Bang Raxê Yùq Lé Yesuq Lhoq Gê byî É Hkyô | | 33 |
| 14. | Yerihko Mâ É Myòqjìt Sû Lé, Yesuq myòq dum myàng nhang É Hkyô | | 45 |
| 15. | Yesuq Lé Zake Huî É Hkyô | | 55 |

Illustrations by Sweet Publishing <http://sweetpublishing.com/>
This work is licensed under the Creative Commons Attribution-ShareAlike 3.0 Unported License. To view a copy of this license, visit <http://creativecommons.org/licenses/by-sa/3.0/> or send a letter to Creative Commons, 444 Castro Street, Suite 900, Mountain View, California, 94041, USA.


Scripture passages are from the New English Translation

The introduction and study questions were developed by Michelle Miller and Pang Snta' to be used with an audience of elementary-age children or with new believers who have limited background knowledge of the Scriptures. The goal of the questions is to help people engage with the Bible stories through a discussion format. The questions in this guide may be freely adapted as deemed appropriate for a particular audience.

Title : Luke Shellbook Vol. III
Translator : Chumlut Ban Htang
 Lahpai Nang Doi
 Chumlut Laq Pa
Editor : ZBTC
Language : Zaiwa
Date : 26th October, 2019
Edition : First Edition

11. Ge É Samariq Byù

The parable of the good samaritan



Lukaq 10:25-37


DANG HPÓNG

Nàng dàm dap wú é lhú? Haî mù dap é lhú?
Haú hkûn, nàng lé ó yùq garúm yu é lhú?


Hkú-nyí ngá-nhúng gi, Yesuq mai garúm yù
râ yhang râ nyì é dàm dap sû eq sêng é hkyô taî
kyô é lé wó gyo râ nghut lhê.

Mhô-myи dangké shî-má, Yudaq byù eq
Samariq byù í hû é hkyô lé wó sê yù râ nghut
lhê. Yesuq é i-pyât má, Yudaq byù eq Samariq
byu pé gi, a htùk lhum kó. Rahû eq rahû gyè su
myít ngam lhûm akô. Haî mù gâ le, rayùq eq
rayùq lùmjíng noqkuq hkyô eq htûnghking pé a
pung lhum kô é yánmai nghut ri.


Mhô-myи dangké shî má, bo é byù í yùq gi,
Yudaq byù chyat nghut akô. Haú nhik mâ é
rayùq gi, hkyangjong hpó, rayùq gi, Lewiq byù
nghut ri. Hkyangjong hpó eq Lewiq hpó gi,
Garaî tarâ lé rago sé su nhik nghut luî, tarâ haû
eq rajung za ashut ashaî asàk duì su nhik nghut
ri. Nghut kôlhang, Garai Gasâng é tengmán
chyitdàp myít haî nghut é hkyô lé wó sé râ matú,
Yesuq mhoq shit é mhô-myи dangké nghut ri.




²⁵ Haú hkûn, wú keq, tarâ sará rayùq gi, toq luî, Yesuq lé, “Sará ê, ahtum abyùq é asàk lé wó yû shoq, ngò hkâsu kut ra râ lhê lhú?” ga luî, Yhang lé myî chyam wú ri.



²⁶ Yesuq gi, “Mosheq é tarâ má hkâsu ga kâ
tô ri lhú? Nàng haû lé hkâsu nghap yu nyi lhê
lhú?” ga luî, yhang lé myî ri.



27 Haú yùq gi, ““Haû Yhûmsîng náng é Garai Gasang lé, náng é myìt nhiklhum bàんshoq, náng é asàk woi-nyí lhum gón, náng é wum-o bànshoq, náng myìt é hkyô bànshoq èq, chyitdàp râ lhê; ‘náng gûng lé nàng chyitdàp é su, náng é chyángnâm mâ é bang lé le chyitdàp àq.’ ”ga tû taî ri.




28 Yesuq gi, “Nàng tû taî é dang jô ri; haû su yhang kut àq, haû jáng nàng gi, asàk duì râ nghut lhê.” ga yhang lé taî ri.


29 Nghut kôlhang, haú yùq gi, yhâng gùngdu dingmán é lé, tûn shit naû luî, “Ngá é chyángnâm mâ é sû gi, ó yùq nghut lhê lhú?” ga luî, Yesuq lé myî ri.




³⁰ Yesuq tû taî é gi, “Byù rayùq gi, Yerusalem
wà mó mai Yerihko wà shut gyó ló le, damyàq eq
htûng huî ri.




Damyàq haú bang gi, yhâng é mèbu pé lé hkyut shang pyám byi kôluî, rayúm gyùt shoq bàt nha mù, alùq shoî shî jáng shèq tô pyâm to kô luî ló byùq bekô.



31 Haú u lé, hkyangjong rayùq gi, haú hkyô
mai laî âng ló le, haû damyaq hui sû lé myàng
jâng, koi laî ló byùq ri.




³² Haû eq rajung za, Lewiq rayùq le, haû mai laî ló é hkûn, haú yùq lé myàng jáng, koi laî ló byùq ri.




33 Nghut kôlhang, Samariq byù rayùq le, haû mai laî ló é hkûn, haú yùq lèq tô é lé myàng jáng, wú shogyo luî yhâng chyáng huî ê mù, yhâng é dàm má, xû eq tsibyiq wing shoq gyun luî, rago za htup byi mù,



yhâng é logúng má, haú yùq lé bún ke luî,
bíng-yhûm ra lhum má jé shoq shuî ló mù, gôn
lajang byî ri.



35 Htang nyí lé, yhang gi, haû bíng-yhûm
yhûmsîng lé ngùn Denari í chap shê byi mù, taî é
gi, ‘Shí yùq lé wú lajang byi laq, yhâng gùng má
nàng myo chung záng é bànshoq lé ngò dum taû
lò jáng, lo xap râ.’ gâ ri.” gâ ri.



³⁶ Hau htâng, tarâ sará lé, “Nàng gi, byù haú bang sum yùq má damyàq huí sû é chyángnâm mâ é dông nghut sû gi, hká yùq nghut râ su ngam ri lhú?”ga luî, Yesuq myî ri.

³⁷ Haû tarâ sará gi, “Haú yùq lé shogyo sû nghut ri.” ga taî ri. Yesuq gi, “Nàng le haú dông ló kut àq.”ga luî, yhang lé taî kat ri.

A. Ahkyo Azó Lé Hpyê Lhûm É Hkyô

1. Tarâ sará gi, Yesuq lé haî myî ri lhû? Yhang gi, haî mù haú su ga myî ri lhú?
2. Garai Gasâng é tarâ gi, haî nghut ri lhú?
3. Tarâ sará gi, Yesuq lé, “Ngá é yhûmkyo chang gi, ó yùq nghut lhê lhû?” ga, Tarâ sará èq myî é gi, haî mù nghut nhô ngam ri lhû?
4. Yesuq taî kyô é mhô-myî shî-mâ é ahkyo azó pé gi, haî nghut ri lhú? (Mhô-myî shî má, da-myàq hui sû gi, hkyangjong hpó eq Lewiq hpó su, Yudaq byù dông nghut é hkyô lé taî kyo râ dùt lhê.)
5. Samariq byù gi, da-myàq hui sû lé, chyitdàp myìt hkâsu tûn shit ri lhú?
6. Yesuq gi, mhô-myî ban taî kyô é htâng, tarâ sará lé haî dum taî ri lhú?

B. Ahkyo Azó Lé Sê Gyô É Hkyô

1. Hkyangjong hpó eq Lewiq hpó gi, haî mù a kâm garúm kô é lhú?
2. Samariq byù gi, da-myàq hui sû lé, haî mù garúm ri lhú?
3. Yesuq gi, tarâ sará lé, haî mù mhô-myi dangké taî kyô ri lhú?
4. Garai Gasang èq ngá-nhúng lé chyitdàp nhâng nau é, “chyángnâm mâ é bang” gi, ô pé nghut lhê lhú?

C. Mhoq Yu é Dông Asàk Duì Râ Hkyô

1. Radàm dàm, ngá-nhúng gi, góbang lé, haî mù a kâm garúm é lhú?
2. Garai Gasang gi, ngá-nhúng lé hká dông garúm nyi ri lhú?
3. Ngá-nhúng gi, Garai Gasang garúm byi bê hkyô lé, jeju hkâsu tau râ lhú?
4. Mhô-myi shí mai, nàng haî wó mhoq yu ri lhú?

D. Wó Mhoq Yu É Hkyô Pé

1. Yesuq gi, ngá-nhúng lhúnglhâng é i-myìt nhiklhum lé, sé byi sû nghut ri. Yesuq gi, Yhang ngá-nhúng lé chyitdàp é su, Yhang lé dum taû chyit râ lé láng nyi ri.
2. Dangké: hkyangjong hpó eq Lewiq hpó su, Garai Gasâng é mungdang lé, u-nuq má za kat to luî, gè gè yhang wuîhke jamjau huî nyì sû lé, chyitdàp myìt a wó tûn shit é nghut jáng Garai Gasâng é mungdang gi, a chyân za dùt byùq râ nghut lhê.
3. Mhô-myi shî-má, Yesuq gi ngá-nhúng é matú, ge é Samariq byù eq pung ri. Ngá-nhúng gi, yubàk mara eq byíng mui nyì bang nghut mù, yhûmsing gùng yhûmsîng a wó hkyi yù dùt tô é u má, Yesuq gi, mingkan htoq shí má, gyó lé lò luî ngá-nhúng lé hkyi yù bê nghut ri.
4. Gótû hái jung wó mhoq yu záng ashî lhú? Myi râ dangmyi jòq ashî lhú?


NGHAP MATSÍNG RÂ CHYÚMBUN

Lukaq 10: 27

Haû Yhumsîng náng é Garai Gasang lé, náng
é myìt nhiklhum bànshoq, náng é wum-o
bànshoq, náng myìt é hkyô bànshoq èq,
chyitdàp râ lhê;’ ‘náng gûng lé nàng chyitdàp
é su, náng é chyángnâm mâ é bang lé le
chyitdàp àq.’ ga tû tai ri.

12. Byùq Byùq É Yùqzo

The parable of the lost son




Lukaq 15:1-3, 11-24

Dang Hpóng

Yesuq gi, byu pé lé, Garai Gasâng é hkyô mhoq kyô é hkûn, dangké myo myo chung ri. Mhô-myî shî gi, Garai Gasâng èq ngá-nhúng lhúnglhâng lé hkâ-í yhang chyitdàp é hkyô lé lhoq htoq shit ri. Mhô-myî shí má, yùqzo í yùq é hkyô wó mhoq yû râ nghut lhê. Yùqzo tiq sû yùq gi, yhângwâ chyâng mai sùtzè gàmbùm dûng yu ri. Yùqzo haû, yhâng é gàmbùm lé hkâsu kut lhoq pân pyâm é lé wú wú shâng.

Hparishe pê é hkyô lé le ngá-nhúng myang gyo râ nghut lhê. Hparishe pé gi, hkâsû é byu pé nghut e lé bûn akô lùq? Hparishe pé gi, Yudaq noqkuq htûng mâ é ushuq pé nghut akô. Yhângmòq gi, Garai Gasâng é tarâ pé lé rago sê é bang nghut kômù, góbâng htoq je chyoiyúng bûn akô nghut ri.

Hpyê lhum râ dangmyi: Dangké náng wa, nang lé ngùn rasen byî é nghut jáng, nàng, ngùn haû lé hpàqchyî bò bò hkâsu kut jaì râ lhú?



¹ Ra-nyí lé, Yesuq é dang gyo kó râ ga, kang
guq bang eq yubàk dàp bang gi, Yhâng chyáng lé
zîng bum akô.



² Haú hkûn, Hparishe pé eq tarâ sará pé gi,
“Shí yùq gi, yubàk dàp bang lé lhom hàn yù mù,
yhángmòq eq rahá za, zoshuq nyi ri.” ga taî pùt
nyi bum akô.



11 Yesuq xoq taî é gi, “Byù rayùq gi, yùqzo í yùq wó ri. 12 Haû nhik mâ é tiq sû yùq gi, yhângwa lé, ‘Âwa ê, ngò wó gíng é sùtzè, ngo lé gàm byi laq.’ ga dung jáng, yhângwa le yhâng nhik tâng lé sùtzè gàm byî kat ri.



¹³ Hkâ-myháng a myáng má, yhangzo tiq sû yùq gi, sùtzè bànsdq hkyom yu chûng mù, mau we shut ê luî, haú jowò má, mingkan ngón hkyô châng é má yhang wó é ngùnzè bànsdq lé langsâ pyám bê.

¹⁴ Haû su kut ngùnzè wó miwó lé ban langsâ pyâm é htâng má, haú mau má mùtmó gyó é yánmai, yhang gi, asho awui dùt lo nyì bê nghut ri.



15 Haû mù, haú mau mâ é byù rayùq chyáng,
langchyáng ê kut le, haú yùq gi, yhang lé wàq
rém jang shut nhang kat mù, wàq lé lhom zúng
nhang ri.

16 Haú hkûn, yhang gi, wàq jùm zô é shigyang
cham pé lé lháng, zo naû shoq dùt kôlhang, ó yùq
le a byi zo kó nghut ri.




¹⁷ Haû mù, yhang myìt bûn lo é gi, ‘Ngá wâ chyáng nyi é langchyáng pé gi, agùn agó myàngzô nyì kó râ nghut lhê. Nghut kôlhang, ngò gi, shí jowò má, zò mut wuìshit é eq shi ló râ dùt bê.

¹⁸ Ahkuî, ngò toq mù, ngá wâ chyáng taû ló luî, “Âwa ê, ngò gi, Garai Gasang lé le, nang lé le, shut bê.




19 Ahkuî mai ngò gi, nung zo nghû râ a gíng lo,
hau é yánmai, náng é langchyáng rayùq dông za
ngo lé nyì nhâng laq.” nghû luî, ló taí râ.’ gâ ri.

20 Yhang toq luî, yhângwâ chyáng ló le, yhang
we we má ru nghut ashî hkûn mai, yhângwa gi,
yhang lé lhom myàng jáng, wú shogyo luî, din ê
mù, yhangzô é lìngzing má ê po pyik dàp to luî,
bopuq puq byî ri.



21 Haú hkûn, yhangzo gi, “Âwa ê, ngò gi, Garai Gasang lé le, nang lé le, shut bê. Ahkuî mai, ngò gi, nungzo nghû râ a gíng lo.” ga luî, yhângwa lé dûng tôngbán ri.

22 Yhângwa kûm gi, yhâng é langchyâng pé lé, ‘Réng dik é mèbu hân hân yu lé mù, yhang lé hut byi keq; yhâng é lòq má, lòqchyop chyop byi keq; hkyî má le hkyî-tsung tsung byi keq.



²³ Tsô myum tô é nojûng zo le yu sat keq. Haû mù, ngá-nhúng gi, zoshuq poî kut mù chôm ngón sháng.

²⁴ Haî mù gâ le, ngá zo shí yùq gi, shi byùq é mai, ahkuî dum duì bê; byùq byùq é mai le, ahkuî dum myàng bê.' ga taî ri. Haû mù, yhángmòq gi, ngón ngón zoshuq ló bekô.

A. Ahkyo Azó Lé Hpyê Lhûm É Hkyô

1. Yesuq mhoq byî é hkyô lé, ô pé, lé gyô yu akô lhú?
2. Yesuq lé mara taî hun é bang gi, ô pé nghut akô lhú?
3. Mhô-myî dangké shî-mâ é îwa gi, Yùqzo hkâ-myhó yùq wó ri lhú?
4. Yùqzo tiq sû yùq gi, yhângwâ chyáng mai haî jung dûng yu ri lhú?
5. Yhângwâ chyáng mai wó dûng yu é gàmbùm lé, haî kut pyâm ri lhú?
6. Yùqzo tiq sû yùq gi, haî mù yhângwâ chyáng dum taû ló ri lhú?
7. Yhângwa gi, yùqzo tiq sû yùq dum taû lo é lé wê we mai myang kat é hkûn, hkâsu kut ri lhú?
8. Yùqzo tiq sû gi, yhângwa eq huî é hkûn, haî taî ri lhú?

B. Ahkyo Azó Lé Sê Gyô É Hkyô

1. Yesuq gi, haî mù kangguq bang eq agè ashop bang lé ahkyíng yù luî mhoq shit ri lhú?
2. Hparishe pé gi, Yesuq lé haî mù mara hun akô lhú?

3. Tiq sû yùq èq yhângwa lé yhang wó gíng é gàmbùm dûng é hkûn, yhângwa hkâsu hkâmzo nhô ngam ri lhú? (Yudaq htûng má, zo wuî gi, îwâ chyáng mai gàmbùm a ge dung, îwâ pé mai byi naû jáng shèq ru wó yu lhê).
4. Yhângwa gi, yhangzo tiq sû yùq yhûm dum taû lo é hkûn, haî mù lhom po hkûlum yu ri lhú?
5. Mhô-myî shî-mâ é, yhângwa eq yhangzo lé gi, ó ó lé taí nau é nghut ri lhú?

C. Mhoq Yu É Dông Asàk Duì Râ Hkyô

1. “Yubàk Mara” nghu é gi, haî lhú? Tiq sû yùq é mara gi, yhângwa lé htuq htîng é nghut ri. Ngá-nhúng le Garai Gasang lé záng htuq htîng nyi lhê lhú?
2. Yesuq gi, ngá-nhúng mara kut shut é hkûn, haî kut keq gâ nyi ri lhú? Mhô-myî shî maî wó mhoq yu é hkyô lé taî kyô wú aq. Yhûmsing é mara lé yín yu é bang lé, Garai Gasang hkâsu kut byî ri lhú?
3. Yhûmsing mara lé yín yù luî, myìt lhîng bê sû gi, góbang eq hkâsu zùm yàp râ ri lhú? Hkâsu myìt tê byi râ ri lhú?

D. Wó Mhoq Yu É Hkyô Pé

1. Garai Gasang gi, yubàk mara lé wó hkyut byi sû nghut é yánmai, ngá-nhúng gi, mara hkyut byî é hui râ matú, Yhang lé tôngbán râ dùt lhê.
2. Îwa gi, yhangzo lé chyit é su, Garai Gasang le ngá-nhúng lé chyit lhê.
3. Ngá-nhúng gi, mara dûng tôngbán lo é bang eq mara mai myìt lhîng bê bang lé, lhom hâp yù râ matú, i-myìt hkum hpông to byi râ dùt lhê.
4. Gótû haí jung wó mhoq yu záng ashî lhú? Myi râ dangmyi jòq ashî lhú?


NGHAP MATSÍNG RÂ CHYÚMBUN

Lukaq 15: 20

Hau htâng, yhang toq luî, yhângwâ chyâng ló le, yhang we we má ru-nghut ashî hkûn mai, yhângwa gi, yhang lé lhom myàng jáng, wú shogyo luî, din ê mù, yhangzô é lìngzing má ê po pyik dàp to luî, bopuq puq byî ri.

13. Manggâm Dàp Bang Raxê Yùq Lé Yesuq Lhoq Gè Byî É Hkyô

Jesus heals 10 lepers




Lukaq 17: 11-19


Dang Hpóng

Wángzán hkyô eq sêng é dangmyi: Haî mù, alì buq é lhê lhú? Haî mù alì nòq no lhê lhú? Haî mù wám shun é eq myòq nò no é lhú? Gó yùq lé, dàp sê é nòlì nòjàng pé gi, hká jà jà nghut ri lhú?


Yesuq é i-pyàt má gi, manggâm ana lé yùq hkangmó gyai gyùq akô. Manggâm ana dàp bang lé gi, wà eq wê é jowò má za nyì nhang akô. Haî mù gâ le, manggâm ana gi, góbang lé dàp é yánmai nghut ri. Manggâm dàp bang, byù hpong má ê râ nghut jáng, yhûmsing gùng yhûmsîng “Ngò gi, asân yúng sû nghut lhê.” ga, taî garu râ dùt akô. Haú su ga garû é gi, manggâm a dàp bang we we wó hui kó râ matú nghut ri. Manggâm lé yâ gè râ chi a jòq kôlhang, rayùq yùq chyáng dàp é gi, yhang baú yhang yhó yhó le byùq ló sê lhê. Manggâm dàp sû gi, yhâng é manggâm ge byùq bê lé myang é nghut jáng, hkyangjong hpô chyáng ê tûn shit ra râ nghut lhê. Haû hkûn shèq, yhang lé hkyangjong hpó lhom wú luî, manggâm a dàp bang eq rahá dum wó nyì râ matú ahkâng byi râ nghut lhê.




11 Ahkuî, Yesuq gi, Yerusalem wà mó shut e ló nyi le, Samariq mau eq Galile mau gyoro mai laî e ló ri.



¹² Yhang, wà rawà shut wang ló é hkûn, manggâm dàp é byù raxê yùq eq huî ri. Haú bang gi, we mai yáp to mù, ¹³ Yesuq lé, “Yesuq, Zau ê, ngámòq lé shogyô yù laq ô.” ga luî, wùt garû bum akô.




14 Yesuq gi, yhángmòq lé myàng jáng, “Núngmòq é gùngdu lé, hkyangjōng pê chyáng ló tûn shit keq.” ga yhángmòq lé taî ri. Yhángmòq gi, hkyô má ru sô nyi ashî le lháng, sân-yúng ló byùq bekô.




¹⁵ Yhángmòq chyáng mâ é rayùq gi, yhûmsing gùngdu ge byùq é lé myàng jáng, Yesuq chyáng dum taû ê mù, htê mó èq Garai Gasang lé hkya-ôn é eq,

¹⁶ Yesuq é hkŷi wang má paî gòp to luî, Yhang lé jeju hkya-ôn nyi ri. Haú yùq gi, Samariq byù nghut ri.



17 Haû mù, Yesuq gi, “Sân-yúng byùq é gi, raxê yùq a nghut lhú? Gau yuq gi, hká ló byùq bekô?

18 Shî tûngbaù rayùq mai lai luî, dum taû lé mù Garai Gasang lé hkya-ôn é byù, rayùq le a nyì lo kó lhú?” ga taî ri.



19 Hau htâng, Yesuq gi, haú yuq lé, “Toq mù ló aq, náng é lumjíng myit gi, nang lé lhoq sân-yúng byi bê nghut ri.”ga taî ri.

A. Ahkyo Azó Lé Hpyê Lhûm É Hkyô

1. Yesuq gi, hká shut e ló ri lhú?
2. Ô pé, Yesuq lé, wùt garû akô lhú? Yhángmòq gi, Yesuq lé haî taî akô lhú?
3. Yesuq gi, manggâm dàp é bang lé, haî kut nhang ri lhú?
4. Yhángmòq chyáng mai manggâm hká u byùq ló byùq ri lhú?
5. Manggâm sân yúng byùq é yánmai, Yesuq chyáng dum taû lé mù, jeju bun dang lé taî é hkâ-myhó yùq bo ri lhú?
6. Yesuq lé jeju bun dang lé taî é manggâm dàp sû gi, hkâ-mâ é lhû? Yhang gi, jeju bun dang taî rá matú haî kut ri lhú?
7. Yesuq gi, manggâm ge byùq é Samariq byù lé hkâsu ga myî ri lhú?
8. Yesuq gi, manggâm ge byùq é Samariq byù eq séng luî, haî taî ri lhú?

B. Ahkyo Azó Lé Sê Gyô É Hkyô

1. Yesuq gi, manggâm dàp bang lé radá dàm a ya byî é za, hkyangjông pê chyáng ê nhang kat ri; nghut kôlhang yhângmòq hkyô má ru nghut nyi ashî hkûn haî mù manggâm ge ló byùq ri lhú?
2. Samariq byù gi, haî mù Yesuq lé jeju bun dang dum lo taí nhô ngam ri lhú?
3. Samariq byù mai, jeju bun dang lo taû taî é hkûn Yesuq é myìt má hkâsu ga hkâm zo nhô ngam ri lhú?
3. Samariq byù gi, Yesuq lé jeju bun dang lo taû taî é yánmai, Yesuq chyang mâ é haî wó yû nhô ngam ri lhú?
4. Mhô-myî shi é ahkyo azó mai, Yesuq é hkyô lé, ngá-nhúng haî wó mhoq yu ri lhú?

C. Mhoq Yu é Dōng Asàk Duì Râ Hkyô

1. Yesuq lé jeju bun râ hkyô haî jòq ri lhû? Garai Gasang lé, hká u jeju hkya-ôn le gè râ lhú?
2. Ngá-nhúng gi, Garai Gasâng é jeju lé haî mù, ayang a dàt hkya-ôn é lhú?
3. Ngá-nhúng, Garai Gasâng é jeju lé hkya-on é nghut jáng, hkasû é shimân jeju myang hkam yù râ lhú?
4. Gótû haí jung wó mhoq yu záng ashî lhú? Myi râ dangmyi jòq ashî lhú?

D. WÓ MHOQ YU É HKYÔ

1. Garai Gasang byî é jeju lé, ngá-nhúng jeju hkya-on jáng, Garai Gasang gyai gabú lhê.
2. Garai Gasâng é jì no gyô é hkyô dōng za, Garai Gasang lé lùmjíng lhê nghu é hkyô lé ge tûn shit lhê.
3. Yhûmsîng Yesuq gi, byù lhúnglhâng lé garúm yù râ eq hkyi yù râ matú gyó lé lo é nghut lhê.


NGHAP MATSÍNG RÂ CHYÚMBUN

Lukaq 17: 15 -16

Yhángmòq chyáng mâ é rayùq gi, yhûmsing
gùngdu ge byùq é lé myàng jáng, Yesuq chyáng
dum taû ê mù, htê mó èq Garai Gasang lé hkyá-
ôn é eq, Yesuq é hkyî wang má paî gòp to luî,
Yhang lé jeju hkyá-ôn nyi ri. Haú yùq gi,
Samariq byù nghut ri.

14. Yerihko Wà Mâ É Myòqjìt Sû Lé, Yesuq Myòq Dum Myàng Nhang É Hkyô

Jesus heals a blind man in Jericho



Lukaq 18 : 35 – 43

DANG HPÓNG

Myòqjìt bang lé myang wú akô lùq? Myòqjìt sû gi, garúm byù a bo é za kut wuîhkê wún é hkyô haî haî jòq ri lhú?


Yhûmsîng Yesuq lé, “Dawiq é Yhangzo ê!” ga châng garû é sû gi, ó yùq nghut ri lhú? Dawiq gi, ó nghut é lé sê akô lhú? Dawiq gi, Isira-elaq labaû má myìng kô dìk é hkóhkâm rayùq nghut ri. Hkóhkâm Dawiq gi, Garai Gasang lé chyit sû nghut lhê. Yhang gi, Yhûmsîng Yesuq a hku lé shî é hí 1000 zàn kô má, asàk lé dui laî ló bê sû nghut ri. Garai Gasang gi, Dawiq é awùt ashín mai, hkyi yù Yhûmsîng hku lé lò nhâng râ ga, danggidiq byî tô ri.



³⁵ Ahkuî, Yesuq Yerihko wà nàm má jé lo nyi le, myòqjit é byù rayùq gi, hkyô yàm má zùng mù, dung zô nyi ri.


³⁶ Yhang gi, byù rajùm rayò sô laî ló é htê lé wó gyo jáng, haû haî dut nyi é hkyô lé, myî kat ri.

³⁷ Haú hkûn, yhángmòq gi, “Nazaret wà byù Yesuq laî ló ri.” ga luî, yhang lé taî kyo akô.




³⁸ Haû su gâ é lé wó gyo jáng, yhang gi, “Dawiq é Yhangzo Yesuq ê, ngo lé shogyo yù laq ô!” ga wùt dûng kat ri.

³⁹ Hí má laî ló é bang gi, zim za nyì râ matú yhang lé tân hkûm akô; nghut kôlhang, yhang gi, “Dawiq é Yhangzo ê, ngo lé shogyo yù laq ô!” ga, je riyhang htê mó o mó èq wùt dûng kat ri.




⁴⁰ Haû mù, Yesuq gi, yàp kat mù, byù haú yùq lé Yhâng chyáng shuî lé lô nhang kat ri. Myòqjit sû yhâng nàm má je lé jáng,

⁴¹ Yesuq gi, “Ngò, nàng lé haî kut byi râ ô nau ri lhú?”ga, yhang lé myî kat ri. Haú yùq gi, “Yhûmsîng ê, ngò myòq myàng nau ri.” ga tû taî ri.



⁴² Haú hkûn, Yesuq gi, “Náng myòq myàng sháng gàq! Náng é lùmjíng myìt gi, nang lé lhoq gê byi bê nghut ri.” ga, yhang lé taî ri.



⁴³ Haú yùq gi, haú hkûn jáng, yhang myòq wó
myâng mù, Garai Gasang lé hkya-on uchyang
Yesuq htâng châng bê. Lhúnglhâng bang haú lé
myàng kôjâng, Garai Gasang lé hkya-ôn nyi bum
akô.

A. Ahkyo Azó Lé Hpyê Lhûm É Hkyô

1. Yhûmsîng Yesuq, Yerihko myuq mai laî ló é hkûn, hkyô yàm má dungzô zung tô é sû gi, ó yùq nghut ri lhú? Yhang gi, hkâsu ga wùt dûng nyi ri lhú?
2. Awui ayàm má nyi tô é bang gi, myòqjìt sû lé hkâsu ga taî akô lhú? Myòqjìt sû gi, haî xoq kut ri lhú?
3. Yhûmsîng Yesuq gi, myòqjìt sû garúm wùt dûng é htê lé wó gyo jáng, haî kut ri lhú?
4. Myòqjìt sû gi, Yhûmsîng Yesuq lé haî dûng ri lhú?
5. Yhûmsîng Yesuq gi, myòqjìt sû lé hká dông yâ gè byî ri lhú?
6. Myòqjìt sû gi, myòq dum wó myang é hkûn, haî kut ri lhú?
7. Awui ayàm mâ é bang gi, haú hkyô lé myàng jáng, haî kut akô lhú?

B. Ahkyo Azó Lé Sê Gyô É Hkyô

1. Myòqjìt sû gi, Yesuq lé “Dawiq yhangzo ê!” ga, haî mù wùt ri lhú?
2. Yàp tô é bang gi, myòqjìt sû a garu shâng gàq ga, haî mù taî hkûm bum akô lhú?
3. Yhûmsîng Yesuq gi, myòqjìt sû lé haî mù myòq dum myàng nhang ri lhú?

C. Mhoq Yu é Dông Asàk Duì Râ Hkyô

1. Ó le a wó garûm yu é wuîhke hkyô htûng hui zô wú lhê lùq? Haú hkûn náng, myìt má hkâsu ga hkâm zô ri lhú?
2. Mhô-myi shî mâ é, myòqjìt sû gi, ngá-nhúng lé hkasû é alìk tûn shit ri lhú?
3. Yhûmsîng Yesuq chyáng, ngá-nhúng huî e ló le, ngá-nhúng lé hkûm tang tô é hkyô pé jòq ri lùq?
4. Mhô-myi shî mai, Yhûmsîng Yesuq é hkyô haî wó mhoq yu ri lhú?

D. Wó Mhoq Yu É Hkyô Pé

1. Garai Gasang gi, garúm yù râ matú, Yhang lé kyûdung bâng é htê lé gyo byî ri.
2. Garai Gasang gi, Yesuq lé lùmjíng râ ahkáng yùq hkangmó lé byi mù, lùmjíng é dông mai hkyi yù hkyô lé wó yù nhâng nau ri.
3. Hkristan dùt bê ngá-nhúng gi, góbang Yesuq chyáng lé lò râ lé a ge hkûm tang pyám.
4. Gótû haí jung wó mhoq yu záng ashî lhú? Myi râ dangmyi jòq ashî lhú?


NGHAP MATSÍNG RÂ CHYÚMBUN

Lukaq 18: 42

Hau hkûn, Yesuq gi, “Nàng myòq myàng sháng gàq! Náng é lùmjíng myìt gi, nang lé lhoq gê byi bê nghut ri.” ga, yhang lé taî ri.

15. Yesuq Lé Zake Huî É Hkyô

Zacheus meets Jesus



Lukaq 19:1-10

DANG HPÓNG

Hpyê lhum râ dangmyi – Byù mòqmó zîng um to mù, byù hpûng hkaû má haî düt nyi é lé, a wó byu myang düt é htûng huî wú lhê lhú? Haú u nàng hká má nyi tô é lhú? Haî düt nyi é hkyô lé wó sé shoq nghû nàng hkâsu shi-kùt wú é lhú?

Mhô-myi shî-má kang gùq zô é byù rayùq é hkyô lé wó sé râ nghut lhê. “Kang gùq zô é” gâ é lé sê gyô é byù bo lhê lhú? Yhûmsîng Yesuq gi, Isira-elaq ming má nyi ri. Haú ayòq abun má, Isira-elaq ming gi, Romaq hkóséng ûp é a-ô má nghut nyi ri. Haú hkûn Romaq ming gi, mingkan má kô dik é hkóséng ming raming nghut ri. Haû mù, Isira-elaq amyû wuì gi, Romaq Asuyaq lé kang kat râ düt é nghut lhê. Kang gùq sû gi, Romaq asuyaq é matú kang guq byi sû nghut ri. Haú hkûn kang guq bang gi, asuyaq mai masât tô é htoq je myo shoq gùq akô nghut ri. Haû mù, ming byù wuì gi, haú bang lé a nguì kó nghut ri.




¹ Yesuq gi, Yerihko wà má wàng mù, sô laî ló nyi ri.

² Haú hkûn, haú wâ má, Zake gâ é kang guq agyì rayùq nyi ri; haú yùq gi, sùtzè wó sû nghut ri.




³ Yhang gi, Yesuq hká yùq nghut é lé myàng naù kôlhang, nyhûm sû nghut é htoq agó, byù rajùm rayò chyîn chyap tô é yánmai, a wó myâng nghut ri.

⁴ Haû mù, yhang gi, Yesuq lé wó myâng shoq ga, Yesuq laî ló râ hkyô hí shut din ê mù, hkohûm gâm htoq má ê dòq zung tô ri.




⁵ Yesuq gi, haú jowò má je jáng, tu wú kat luî,
“Zake ê, hân gyó lò àq; hkû-nyí ngò náng yhûm
má bîng râ nghut lhê.” ga taî ri.




⁶ Haû jáng, Zake gi, hân hân gyó ló mù,
gabú dik é èq Yesuq lé lhom hkûlum yu ri.

⁷ Haû má nyì bang bàンshoq gi, haû lé
myàng jáng, “Yhang gi, yubàk dàp sû rayùq
chyáng bíng kut râ ga wang e ló bê.” ga luî,
mara hûn dang taî nyi bum akô.



⁸ Zake kúm gi, toq yàp mù, “Yhûmsîng Yesuq ê, ngò wó é sùtzè rawuí gû myÙng bang lé gàm byî pyám râ; ngò záng mop zô pyâm é byù rayùq yùq nyi le gi, myi tú dum tau byi râ.” ga Yhûmsîng Yesuq lé taî ri.



⁹ Haú hkûn, Yesuq gi, “Shí yùq le, Abraham é yhangzo rayùq nghut é yánmai, hkû-nyí shí yhûm má hkyi yù hkyô jé bê,

¹⁰ hkâsu mù gâ le, haû Byu Yhangzo gi, byùq byùq bê bang lé, hkat hô mù hkyi yù râ matú, jé lé sû nghut lhê.” ga luî, Zake lé taî ri.

A. Ahkyo Azó Lé Hpyê Lhûm É Hkyô

1. Zake gi, haî kut sû nghut ri lhú? Yhang gi, hkasû é byù nghut ri lhú?
2. Yerihko wà mai Yhûmsîng Yesuq laî ló é hkûn, Zake gi, haî mù, Yhûmsîng Yesuq lé a wó myang é lhú?
4. Yhûmsîng Yesuq gi, sikgâm htoq má zung tô é Zake lé myang é hkûn, yhang lé haî kut nhang ri lhú?
5. Byu pé gi, Zake é yhûm má Yhûmsîng Yesuq, ê bîng é lé myàng kô jáng, hkâsu ga taî akô lhú?
6. Zake gi, Yhâng é yhûm má Yhûmsîng Yesuq lé bîng é hkûn, hai danggidìq byî ri lhú?
7. Yhûmsîng Yesuq gi, Zake lé hai taî ri lhú?
8. Yhûmsîng Yesuq, mingkan htoq má gyó lé lo é gi, ô pé lé hkyi yù râ matú nghut ri lhú?

B. Ahkyo Azó Lé Sê Gyô É Hkyô

1. Zake gi, haî mù Yhûmsîng Yesuq lé myàng nau ri lhú?
2. Yhûmsîng Yesuq gi, haî mù Zake é yhûm má bîng nau ri lhú?
3. Zake gi, haî mù myìt lhing byùq é lhú?
4. Yhûmsîng Yesuq ho nyi é, “Byùq byùq bê bang” gi, ô pé lhú?

C. Mhoq Yu é Dông Asàk Duì Râ Hkyô

1. Nàng gi, haî mù Yhûmsîng Yesuq lé lùmjíng râ lhê lhú?
2. Náng é asàk duì hkyô má, Yhûmsîng Yesuq lé a wó myàng shoq hkûm tang tô é (wuîhke hkyô eq gótû hkyô pé) haî jòq ri lhú?
3. Hkû-nyí, ngá-nhúng gi, Yhûmsîng Yesuq mhoqshit é hkyô lé, hká dông wó gyô yu lhê lhú?
4. Yhûmsîng Yesuq é chyitdàp é hkyô lé góbang sé shoq, ngá-nhúng hká dông tûn shit râ lhú?

D. Wó Mhoq Yu É Hkyô Pé

1. Yhûmsîng Yesuq gi, ngá-nhûng lhúnglhâng bang lé chyitdàp lhê. Haû mù, ngá-nhûng é yubàk mara lé ayang hkyut pyám byî nyì sû nghut lhê.
2. Yhûmsîng Yesuq gi, yhang lé sé naû sû lé le, Yhâng é chyitdàp myìt eq mara hkyut byi hkyô lé, sé naû bang lé le hkâ-nhám a tô pyâm to nghut ri.
3. Yhûmsîng Yesuq é chyitdàp myìt gi, ngá-nhûng é i- myìt nhiklhum lé le, ngá-nhûng é nyì yàp hkyô lé le, gó bang eq zùm yàp é hkyô lé le, wó htaî lhik pyám byî lhê.
4. Gótû haí jung wó mhoq yu záng ashî lhú? Myi râ dangmyi jòq ashî lhú?

NGHAP MATSÍNG RÂ CHYÚMBUN **Lukaq 19:10**

Haû Byu Yhangzo gi, byùq byùq bê bang lé, hkat hô mù hkyi yù râ matú, jé lé sû nghut lhê.” ga luî, Zake lé taî ri.

